

Nowodhow an Seythen

12/01/09

Na wra skollya atal nuklerek yn Kernow.

Henn yw an messaj dhe Gonsel Kernow wosa ni dhe glewes bos gorhemmyn rag may fo bos ervirans an konsel 'dasgelwys'.

Nans yw nebes misyow... Konsel Kernow a erviras na via da gansa hwilas tyller rag skollya peulow-radyo-byw y'n Ducheth.

Byttegyns, dew gonsler re dhanvonas lytherow e-bost yn unn wovyn may fo possybyl mires orto arta.

Lemmyn yma lies konsler aral ow leverel nag yw tybyans da gorra an atal yndann agan dor drefen nag eus dor mas rag an porpos ma.

Warlergh kows, yma meur a arhans gans kudha atal nuklerek... ha ni y'n termyn a erbys kales ma, yma nebes tus ow hwilas fordhow erel a skoodhya gonisyow yn Kernow.

**

Dy Sadorn yw passyes hag yth esa kaskyrgh erbynn gwynsel hir dhe'n Edenva.

Yma bagas a dus y'n kyrghyn na ow strivya erbynn towlen drehevel an turbin... diwweyth an hirder a Goloven Nelson yn Loundres.

An bagas a lonchyas pelen ayr y'n ebren yn ogas dhe'n Edenva... ha'y nija orth an keth nivel a-vell penn an turbin.

Yma an gaskyrhoryon ow leverel bos namm war an worwel ha ny goodh bos ervirys.

**

Orth diwedh an mis ma yma keskusulyans war an taves arta.

Sodhva Maga a garsa degemmeres formow omrolya a-dhyworth pubonan skaffa gyllens.

Y fydh chons a glappya a-dro dhe lies mater a vern dhe'gan yeth ni... hag y'ga mysk: fatel yw an Furv Skrifys Savonek.

**

Hag yth esa Kernow gorrays a-dherag oll a Vreten Veur y'n seythennewow eus tremenys... gans towlen bellwolok henwys: More Three Men in a Boat... po, moy a dri den yn skath.

Ynni... yth esa Griff Rhys Jones, Rory McGrath, ha Dara O'Briain ow kollya dhyworth Aberplymm, a-hys arvor Kernow, bys dhe Syllan.

Yth esa a-hys an fordh lies treveth didhanus, hwarthus, ha dhe-les.

Byttegyns, dres oll, chons o dhe Rory diskwedhes y bow y honan dh'y gowetha... ha dhe dus erel y'n kethsam termyn.

Da o gweles Rory... den a Rysrudh... dhe gara materyow kenedhlek Kernow.

Yth esa y'n dowlen lies chons a weles baner Pyran... ha Rory ow kana Trelawney.

**

Henn yw oll rag an seythen ma... bys nessa seythen... agas gweles.